

蕉  
舍  
吟  
草

顧一樵著

世界書局印行

蕉  
舍  
吟  
草

## 蕉舍吟草序

余生四十年，歲庚辰，居茅廬，方學作詩詞。今存者僅茅廬浮圖各一首。辛巳喪女，慰慰，悲不自勝，赴東南旅途中，和淚作七絕四首，用梁任公癸亥爲余書申，鳧盟詩韻，末首有曰：『曇花一瞬，檀香散，夢斷千山萬水中，』紀實情也。是年秋始與段熙仲、華仲慶等論詩，偶得天心一首，上半曰『午夜人聲靜，空山鳥語稀，天心雲出處，秋夢月來歸，』尙覺可喜。後續成『不惑今誰我，難知昨是非，葉紅堪煮茗，苔綠上征衣。』試作七律，益感工力不敵。時張北海作歸舟，華仲慶作辨懷，俱有宋意，乃學和鄉夢雲上二首。東南歸途，在曲江得句曰：『一夜雨聲驚客夢，九齡風度仰危樓。』秋間遊黔，作花谿吟，前溪先生賜和，有『東北支離悲痛在，西南飄泊苦甘同』之句，大有杜意，心嚮往之。後作

先父六旬紀念詩曰：『撥亂興邦夙夜心，冰寒履薄凜淵臨，波濤東海鯨鯢沸，烽火南疆盜寇侵，』友好以爲學杜，而『萬國旌旗明指掌，滿天星月叩靈襟，』實不啻太平洋戰爭同盟國成立之預言。待冬月赴昆明，遊大理，訪一塔寺，登點蒼山，則我國軍已決定遠征緬甸矣。

壬午春月登塗山，得句曰：『三過家門身不入，塗山難紀禹功年，凝雲月待星槎客，飛瀑蓮開水洞天。』不久，沈尹默先生發表偶效義山之作，友好爭相傳誦，乃學和數首，每首用句，大多平平，例如『病裏情懷風裏月，夢中消息雨中煙，』『倚竹橋邊燈似月，浣花溪上雨如煙。』第四首有句曰：『多情每苦愁如海，無語翻甘夢似煙，』似略勝，而接句『月顫窗紗傳脈脈，星搖燭影護翩翩，』亦較『低吟欲吐春絲盡，薄醉微憐燭影翩，』爲優。可見詩意詩境詩情詩心決非易易。臘戌失守，余用前韻懷之：『四十功名塵與土，大千世界

氣如煙；『邊外忽傳空臘戍，詩書漫卷意潛然。』由義山之作，一變而爲工部之調，豈得已哉！是年夏間，再遊皋蘭，初謁成陵，有句曰：『立馬崑崙懷博望，揮戈定遠靖萊茵。』是時德蘇戰局未定，而新疆已重歸中央，故余有西北西南同時遠征歐陸之夢。倘能成吉思汗於九原，或不以余爲狂妄也。『籌邊豈必欲生還，留得丹心照雪山。』敬爲我籌邊將士誦之。

癸未春，余奉命訪印度，遍歷諸天竺。和平鄉訪詩翁泰戈爾故居，有詩紀曰：『雲遊來聖地，瞻拜入仙鄉。』『新月靄相照，緬懷白髮長。』鹿野苑爲法輪初轉聖地，有中華寺、綺琴台、愛羅蘭、千佛洞均爲大觀，詩以紀遊。塔琪宮爲印度蒙古王紀念其愛后之大理石墓，舉世聞名。余譯回教聖哲伊克博詩曰：『白壁生輝勝逝水，青春暫駐永長年。』『情懷自訴神天恨，淚睫交凝海石穿。』後遊錫金大吉嶺，感賦一律，曰：『何意王師輕出塞，徒教藩國失和戎，追

懷六十年來事，漢月依依入夢中。」

三竺歸來，乃赴新疆，計得南疆雜詠二十四首，又詠北疆十首，青海二首，皆絕句。友人最喜誦者，爲南疆雜詠之第一首及第末首：『未夢江南尋塞外，已隨明月到南疆；』『明朝有客崑崙去，傳語還憑馬上詩。』此類詩句，不到塞外，不易拾得也。維族語言謂跳舞爲「爲郎」，余曾戲作「爲郎歌」附錄於此：『儂上鞦韆櫻在口，郎騎白馬拴垂柳，新月如鉤人去後，爲郎憔悴爲郎瘦；』『郎去南山除猛虎，去時桃杏紅無數，雪盡春歸郎未娶，爲郎歡笑爲郎舞。』

甲申春日，吳稚老八十，詩以壽之曰：『民生崇技藝，國語注音符，八十凌雲志，九洲勝五湖。』秋冬之交，中央徵集青年從軍，余有請纓之作：『絃歌風雨憶雞鳴，漫卷詩書樂請纓，四海干戈崇武德，八荒藍縷啓文明。』又和柳翼

老曰：『書生投筆從戎熱，國士貢言獻曝狂，豈爲楸枰爭黑白，欲憑肝膽報炎黃。』中央大學女同學從軍，余贈句曰：『好男誰說不當兵，好女今朝亦請纓。』『不辭石砮中流砥，寧別沙坪萬里征。』此詩已由劉雪厂先生作曲，爲女聲三部合唱譜，曾於音樂會中演唱。又舊作『落日洞庭霞，橫戈猛士家，』前由陳田鶴先生作曲，譜見樂風。

在時局十分緊張之中，余曾因禮樂館開會之便，赴北碚小住，見四弟壁懸山谷墨披，因得句曰：『有情皆滿願，無佛獨稱尊。』後返沙坪壩，繼成一律：『白首嘉陵客，青春字水痕，思量空涕淚，笑語記溫存，入世多情累，諸天我佛尊，散花香滿月，冰雪淨詩魂。』余於中大百忙中得此收穫，頗以自慰。

乙酉春日，余與三弟同遊真武山，歸來得句：『蜀土堯天闢，塗峯禹迹殊，呼歸雲作石，疏治水成圖。』元宵卽事句曰：『山中冬葉落，枝上喜春來。』植

樹節句曰：『塗山原蜀女，落地始天真。』後數月間，頗擬從此擱筆。日寇投降，喜訊傳來，乃朗誦工部詩句『却看妻子愁何在，漫卷詩書喜欲狂。』重理詩囊，率成一律：

「拋却詩囊會幾時，驚人消息耐人思，八年涕淚愁何在，萬里江鄉夢亦疑，猶喜童心聞捷報，敢忘慈訓誤歸期，明朝巴峽樓船下，長跪萱闈訴別離。」

至是余決計返滬省親。八月十八日由渝飛昆，二十日轉芷江，二十七日抵南京。九月二日余首次返滬，五日返京，九日參加受降典禮，有詩紀曰：『受降台築紫金山，八載艱辛奏凱還。』八年抗戰，於此告一段落矣。

本集卷一，共收五律四十五首，五絕二十五首，七律五十首，七絕八十首，共詩二百首，字七千三百四十。起民國二十九年庚辰，至民國三十四年乙酉，

歷時六年。

本集卷二，共收詞五十首。較長調爲沁園春，百字令，滿江紅（四首）。平韻滿江紅係十萬英雄歌，驀山溪係青年從軍歌，御街行係送出征將士歌，好事近係自由中華歌，均已請人作曲。又塞外江南由劉雪厂製譜，喜雨由應尙能製譜，均調寄浪淘沙。

余填詞間喜用昔人韻，如沁園春用陸放翁韻，滿江紅用岳武穆，薩都刺韻，千秋歲用謝逸韻，唐多令用陳允平韻，鷓鴣天用辛稼軒韻，添字采桑子用李易安韻。其他和友人韻或用前韻者尙有八九首。故用韻自受限制者約佔總數三分之一。

以同調計，滿江紅四首（內平韻一首），臨江仙，鵲踏枝，南鄉子，浣溪紗各三首，鷓鴣天，浪淘沙，西江月，武陵春，添字采桑子，卜算子，點絳脣各二首。故

除重複者外，實得詞調三十二。另附曲四首，曲調一。

近年長國立中央大學，得識詞家喬大壯先生，屢承教益。又本集所收詩詞，曾請盧冀野兄分別指正，一併誌感。

今年元旦，冬月團圓，因填臨江仙曰：『夢裏山川身是客，微波蕩漾嘉陵，扁舟誰與五湖清，今年元夜好，明月是歸程。』

前在青木關會填西江月曰：

『客裏又逢花好，夢中已見峯彎。蛾眉作別故鄉還，共飲梁鴻溪畔。』

日寇投降，勝利來臨，敬唱滿江紅曰：『馬關約，恥須雪，高句麗，恨曾滅。受降台重築，紫金山缺。一代凌煙燕許手，千秋流碧蓑弘血。看今朝大纛引神鴉，瞻陵關。』

三十四年十一月十五日，顧一樵。

## 再版序

勝利歸來，曾集抗戰時所作詩二百首，詞五十首，刊印蕉舍吟草，謬蒙友好不吝指正，惠賜唱和，感慚奚似。丙戌春夕，閒步滬濱，偶得江南簫鼓一闋。二月二十五日赴東瀛，歷訪橫須賀港，吳港，廣島，神戶，大阪，京都，名古屋。四月二日，乘我國空軍首次訪日專機返華。計程五週，得詩十首。其中壯遊一首，步杜少陵五十六韻，歷敘自余入清華讀書，而遊美，而返國，而任教，而抗戰，以至於三度赴日，三十年來事。昔時友好，如地山，如一多，均已作古，有不堪回首之感。余另有散記行雲流水，可相參證。

同年七月三十日離滬，經東京，關島，強生島，檀香山，於八月二日飛抵舊金山。十日由洛杉磯東飛，十一日抵華盛頓。十八日訪波士頓，二十二日訪達

爾頓之雷特飛機場。二十九日午夜離紐約，經新芬蘭，三十日午夜到倫敦。九月二日，飛巴黎。五日，抵瑞士。在美時僅填南浦二闕。中秋節在瑞京熊城。翌日登聖女峯，後一日訪日內瓦，填水調歌頭二闕。九月十五日返巴黎，填八聲甘州及滿庭芳。憑弔拿破侖墓，憶舊作項羽劇，因填六州歌頭。十月五日，返英，寓牛津，訪莎士比亞故里，並與熊式一陳通伯訪蕭伯納翁。莎翁商籟及法詩人翁賽詩二首，卽於是時譯成。十一月一日，至倫敦海邊候機，二日起飛，經法意埃及，伊拉克，印度，緬甸，暹羅，六日抵香港。由英乘飛船歸途中，填水龍吟三闕。七日，改乘中航機飛滬，翌日爲先父三十周忌祭，途中有詩記曰：『奉母重違經月別，飛帆萬里託歸鷗，鄉心五處同長夜，淚灑孤兒三十秋。』是時母親及大哥小妹在滬，三弟在北平，四弟六弟在南京，五弟在華盛頓，而余在由歐返國途中也。及抵首都，已秋深，成七律二首。

丁亥春，赴蘇州訪顧丞相墓，作穹窿訪顧墓記，又赴崑山謁亭林先生墓。夏日赴臺灣，登草山，遊日月潭，訪高山族，因作水龍吟曰：

『却看天開南極，隱蛟龍雲沙無際。煙生日脚，冰寒月窟，鯨鯢誰騎。流水渠成，高山族聚，翠凝香寺。喜梅花纔放，荷花便見，古東溟地。』

初秋來京，聞史梅溪東風第一枝歌曲，戲填秋虹曰：

『薄雨飛虹，涼風寒露，乍難將息。寒暖殘荷，玄武秋深，衰柳秦淮意淺。枝枝葉葉，待冬盡垂絲春軟。儘多情，宛轉嬌鶯，驚起磯頭雙燕。』

中秋返滬，闔家團聚，填聲聲慢曰：

『瓣香初繞，綵燭還雙，天上幻影重重。擁出層霄，雲浮七寶玲瓏。……散花處，看嫦娥起舞，桂殿蘭宮。』

秋意漸濃，秋聲環繞，余用稼軒韻填摸魚兒以送秋曰：

『更難收莫愁煙雨。磯頭燕子飛去。秦淮凝碧鍾山紫，霜葉棲霞無數。秋  
勿住，弔井底胭脂寂寞台城路。江山不語。問花落花開，花殘花好，非霧亦  
非絮。楸枰裏，不道蒼生盡誤。幾番風月相妬。陰晴圓缺風知否，離合悲  
歡空訴。風莫舞，怕亂葉隨風席捲中原土。興亡最苦。且共撫危欄，秋聲環  
繞，更上一層處。』

至此余決計不再作長短句矣。

再版續收各詩，最近者爲丁亥春日所作之玄武湖：

『湖上風光別有天，江南春去又經年。扁舟拂柳斜陽外，好夢依人逝水  
前。花鳥閒雲愁脈脈，釵鈿橫海影翩翩。蒼茫獨對三更月，不待銷魂便黯  
然。』

去秋余曾發表「中國的文藝復興」五篇，已交中華書局出版。近年試作詩

詞，所以明其中甘苦，即擬告一段落。舊作爲初版時刪去者，姑再酌增若干首，以誌鴻爪。五古數首，採自歷史劇蘇武，曾在重慶演出，並見商務本。

昔年在渝，曾試譯貝多芬第九交響樂第四樂章之快樂頌，由國立音樂院在青木關演唱，並交大東書局出版。歐遊時曾在倫敦欣賞斯樂，得與英譯歌唱對照。去夏遊臺北，會由交響樂團及合唱團作偉大演出，尤可欣慰。

戊子春，太平老人 三原于公七十壽，徵詩詞，余苦無以應，乃集于公句以壽曰：『我生爲世平不平，羣衆無聲似有聲，潤色江山一枝筆，和風甘雨老人星。』蓋輟筆數月，不彈此調久矣。

三十七年五月四日，顧一樵於金陵。

戊子夏日，詞人喬大壯先生自臺北返京，相與暢談。勝利後拙作，均請評正，並閱及「中國的文藝復興」校樣之一部。余以國立政治大學將成立，中國文學系請來任教，蒙慨然允諾，並謂即擬留京。滬度暑，存臺書物可分贈臺大友好云。午後同遊中山陵靈谷寺。隔若干日，余以聘書送喬先生京寓，適已赴滬，蒙代收，因留置焉。孰意不數日，噩耗傳來，先生竟自沉於姑蘇矣，傷哉！

八月十日，由京飛平，計已別十一寒暑。十七日赴瀋陽，訪北陵東陵。廿一日返平，有昆明湖泛舟賞月之約，未果往。翌日赴津，中途車阻，隔日復往。三十日飛青島，登勞山，作海水浴，遊湛山寺。四日抵滬，八日返京，而再版校樣已擱置案頭二旬矣。校既竟，夜過半，填金縷曲，以悼大壯詞人。昔顧梁汾於納蘭容若歿後，偶填大江東去，加跋語曰：『嗚呼，容若已矣，余何忍復拈長短句乎！』余不敢望前賢，心之所感，覺無以對老友，姑破涕爲之耳。九月九日夜校後記。

# 蕉舍吟草

顧一樵

初版序

再版序

卷一 詩

一

卷二 詞

四九

卷三 詞續

六七

卷四 詩續

七九

卷五 譯詩

一〇五

蕉舍詩稿

蕉舍吟草卷一 詩

五律

辛巳

天心 次段熙仲韻

午夜人聲靜空山鳥語稀  
天心雲出處秋夢月來歸  
不惑今誰我難知昨是非  
葉紅堪煮茗苔綠上征衣

南華寺

頓悟離名相眞常不二門  
菩提非有樹葉落自歸根  
地淨花無住心明性乃存  
一塵渾不染萬象盡皆春

凝雲道院瞻林則徐題額



(南)

馬首仰前賢焚煙溯百年心丹涵白日凝翠問青天剝蝕存遺蹟摩挲豈夙緣  
臨行頻囑語莫負此流傳

太平寺福晉堂夜宿

爲訪藍田道曾來錦石鄉歸程覺路近夜宿福音長十誠非難信多神偏易忘  
須防求佛客禱雨問天堂

夜闌

有酒同君飲胡爲學苦吟夜闌還得句烏倦自歸林月白浮雲淡星稀覺露侵  
青春長不老底事濕羅襟

潛廬 次郭洙若韻

病瘦豈關愁高吟獨倚樓詩心瑩夜月文藻溢江流婉婉唱隨樂殷殷談吐憂  
歲寒松柏意冰雪滿峯頭

知音

何處女詞宗鳴琴復撫松知音空冀北絕響溯江東起舞羅衫薄宜妝夕照紅  
吟成閒握管林下樂清風

聞青木關暴雨成災

鄉人惜咫尺棲集水之灣喜雨還遊寺狂流欲避山安貧驚宅泛濟困歎緣慳  
室罄真無地如何挽世艱

寄母 慰國生日

孫枝連理發善慶慰重闈世澤文章在光華歲月飛中天方日永花甲待兒歸  
海國來青鳥雙星照母徽

懷舊京

勝朝佳麗地烽火動遼東文物銷千載衣冠玷九重桂香沉玉宇瓊島訴金風

血染秋知晚翠微  
山色紅

落日

落日洞庭霞橫戈猛士家  
九疑風引淚三戶血成花  
楚水千鞭斷湘波萬櫓斜  
平倭誇宿將再捷報長沙

喜聞鄂豫雙捷

漢幟瀟湘展黃河水又清  
中州明月夜萬里大江聲  
國秉元戎算人懷猛士行  
三游歌至喜八表望功成

秋光何皎潔海宇看澄清  
天際千帆影江流萬壑聲  
舳艫今夜下壯士故鄉行  
早報荆宜捷收京待有成

夜過花楸坪贈仲麀

更嫌華髮短三十古人心  
養志空塵慮怡情樂苦吟  
花楸雲出岫倦鳥暮歸林

夜色蒼茫裏家山此處尋

失路吟

故鄉日以遠遊子白雲心爲作憂天問來悲失路吟車迴身入夢秋盡鳥離林  
云暮復何止吳山處處尋

贈凌竹銘

爲補天工拙百年獻此身金戈揮大地鐵馬靖煙塵志遠西陲路風高北海人  
隴頭梅早放寄我一枝春

悼泰戈爾

吾愛泰戈爾詩歌天下聞迷途惜飛鳥新月靄停雲淳化原無外高情豈不羣  
黎明方待旦風雪仰斯文

寄姑母

歐孟宏農繼武陵自數珍雍雍容大度穆穆藹相親  
黿渚江天望龍門海日新  
惠泉歸可待池上草堂春

律呂

次張充和韻

云何知律呂誰處魯王宮樂始黃鐘籥韻生白露叢  
琴心籠曉月詩意寄清風  
瑟瑟冰絃響天寒譜大同

思歸

次華仲慶韻

便欲辭官去其如不得歸親慈疏定省別遠失從違  
識字由來苦求全百事非  
何當將老母倦鳥入林飛

謝友好贈書畫

次彭醇士韻

投贈情何摯茅廬不閉關詩清澄蜀水畫好接吳山  
天際雙帆遠江流一日還  
梅開香雪海湖上共酡顏

贈陳立夫

謙謙君子樂靄靄鬢微霜探易知無惑唯生論克昌人倫師表重主義大同揚  
教戰先明恥艱辛共味嘗

壬午

祝慈親六十壽

叩別慈親遠寒來欲拜闌三冬家世在一夜雪花飛入畫吳山永迴天蜀道歸  
芬芳長皎潔誦此祝清徽

忠孝承家訓思親久別闌月圓添母壽花甲護雲飛弱水千山祝孺心萬里歸  
巴渝寄遊子瞻慕託金徽

漢四傑

爲雪韓人恥雲沙博浪揚授書雙石在創業一椎藏世說赤松子山深紫柏香  
封侯非素志談笑別君王

匈奴猶未滅西域付張騫臂斷烏孫召途通大宛先漢垣明水草博望動祁連  
瞻墓封泥在黃沙上塞煙

生死從司馬終成絕域功水清魚不大風急志長空都護天山遠勒銘瀚海雄  
辭傭投筆去未負少年衷

諸葛起躬耕難忘三顧情一心惟漢室兩表見忠貞討賊祁山出征南孟獲平  
至今傳父老赫奕仰神明

贈內

良緣歸我晚倏忽十三年每諱多兒苦無誇萬里遷茅廬初種圃蕉舍自炊煙  
家有豆花好陶陶共樂天

送仲廖返黔

興學百年事青春作伴歸  
誨人知不倦純孝曰無違  
豈任成漂泊難爲困是非  
倚閭猶在望慈母霽顏飛

癸未

和平鄉訪泰戈爾故居

雲遊來聖地瞻拜入仙鄉  
啼鳥驚春夢飛花笑夕陽  
清歌澄俗慮妙筆放靈光  
新月靄相照緬懷白髮長

哈密贈吳澤湘端午

故人同出塞佳節共天涯  
願啖崑崙雪未甘哈密瓜  
青天開綠野白日映紅花  
漢月秦關好男兒到處家

北泉議禮賦呈孝園院長

胡爲崇禮樂將以待功成元首屢諄囑時賢未忘情  
泉清羣議集風遠片帆輕  
戴氏承家業縉雲致太平

除夕辭別禮樂館全人

黃鐘初欲定律呂有新聲  
禮制從清議湖泉却俗情  
過年諸事足辭館一身輕  
爆竹由來舊家家話太平

甲申

壽吳稚老

中華尊一老斗室仰宏儒  
革命稱先覺考工道不孤  
民生崇技藝國語注音符  
八十凌雲志九洲勝五湖

贈柳翼老

柳公道性善講座發宏論世界大同日知行不二門陽明理以廣安定教斯存  
妙諦是非證中衢欲設尊

贈潘光旦

胡爲精奧義將欲闡通論未賞中秋月還遊大學門人文窮所本天道樂常存  
更作優生說性明理以尊

和林同濟

英雄同所見世事笑螭爭共勵凌雲志長懷細柳營高風舉世重清議一身輕  
且任人常醉聯吟解宿醒

結廬示四弟

結廬在北碚五載歇雲根爲愛嘉陵水未登迦葉門有情皆滿願無佛獨稱尊

擾攘人間世是非存不論

白首

白首嘉陵客青春字水痕思量空涕淚笑語記溫存  
入世多情累諸天我佛尊  
散花香滿月冰雪淨詩魂

乙酉

真武山 示三弟

蜀土堯天闊塗峯禹迹殊呼歸雲作石疏治水成圖聖戰慙瀛島王師耀漢都  
巴渝春日麗覽勝立踟躕

元宵卽事

山中冬葉落枝上喜春來風靜元宵月香浮縉嶺梅戲兒人影亂攜手笑顏堆

天竹未清供水仙倘已開

張士一先生任教卅年詩以奉賀

貫通儒釋道腰脚健而輕異學傳歐舌正音比夏聲  
八千桃李熟三友柏松貞  
重續南雍志高吟致太平

植樹節 慰民生日

十年能樹木百世有傳人冬盡茹冰樂春來詠絮珍  
塗山原蜀女落地始天真  
白髮江東望含飴待慰民

柏溪行

江風春月夜爲作柏溪行煙樹螢初出雲帆浪早生  
花香天半散鵲語夢中驚  
欲挽韶光住鶯聲一住清

五絕

辛巳

開元寺

開元尋古寺雙塔紫雲深  
甘露桑蓮迹青天白日心

詩山

傍林宿鳥歸高蓋影依稀  
留得詩山恨親恩託夕暉

南安懷鄭成功

慷慨我從戎殊勳俞戚同  
焚衣投筆子志決始成功

鳳山寺

孝子人傳郭年年祀鳳山  
尊王應滅寇廣澤被台灣

水吉

水吉水仙茶春來未掇芽卻看階上菊今日已黃花

崇安

綠野田田葉紅荷滿眼簾白鵝偏自在肯問米和鹽

雙溪懷易安居士

雙溪流日夜煙雨白雲樓舴艋吳兒競新詞自遣愁

砵石訪中山大學

載誦金雞嶺行歌武水遊南風競砵石桃李徧原疇

柳州

晉祠猶在憶難老古泉流桐葉唐封辨吾懷柳柳州

河池車阻

蜀道古稱艱  
河池路亦難  
驛前揮汗客  
明日發南丹

婁關

婁關午夜征  
九折上楸坪  
風拂參辰曉  
雲深一鳥鳴

中秋雜詠

萬里蜀山尋  
迢迢蜀水深  
朱霞赭天半  
千丈落江心

嘉陵江

鷹岩登古道  
遲暮入蒼茫  
明月山頭現  
白雲問故鄉

老鷹岩

皎皎中秋月  
征人夢欲還  
露華今夜白  
歌樂在斯山

歌樂山

再報長沙捷  
居閒半日家  
三關鳴爆竹  
落木亦飛花

青木關

壬午

晨浣

曉日花間照清溪石上流浣衣還濯足童子汝何愁

雨八月初四晨口占

不覺秋涼早還疑夜露濃窗前凝佇立細雨滴梧桐

癸未

泰戈爾訪華

昔作中華客相逢多不識主賓額手親彼此無間隔  
震旦佳名錫錦衣贈遠人中心常感激得友此生新

蔣委員長訪印

元戎來天竺宛似曾相識額手禮佳賓情深不可隔  
雅飭中華語章身上國衣一心同一德故友復依依

戴院長訪印

發願朝天竺善緣誰不識爲宏佛法尊甯讓須彌隔  
倡建中華寺重修鹿野緣直追玄奘蹟一代有傳賢

甲申

羅達克西蘭校長訪華

哲人來作客一見成相識額手意倍親真誠無間隔  
客識中華心有語告知音聖賢時輩出文化自更新

七律

庚辰

茅廬 七月七日夜葉元龍韻

自結茅廬隱一樵，疎星點點耿天寥。  
鄉音久斷還看月，雨偶來且聽蕉。  
遙寺晚鐘驚宿鳥，客船歸夢阻殘橋。  
流人苦望收京早，烽火家園柳萬條。

辛巳

上饒贈顧長官

吾宗一脈越王承，坐擁貔貅頑寇懲。  
上將雄詞辛棄疾，大師證史柳詒徵。  
信州形勢連三楚，江左文章重九能。  
虎帳掀髯同夜雨，感懷末座亦飛騰。

贈趙曾珏王世穎

畫角聲中別緒多，偶然聚首得懽歌。  
亭名必必同心印，齋榜爲爲一氣和。  
共我耽吟斟字句，謝君傳語送音波。  
何年勞燕重相會，痛飲扶桑看止戈。

吉安謁文丞相祠並悼上高陣亡將士

丞相遺祠此處尋，吉安城外樹蕭森。  
丹忱好引燎原火，正氣長留肅穆音。  
捷報上高殲巨寇，爭傳儒將擅清吟。  
一碑高矗凝新碧，祖國爲殤萬古心。

曲江

秣馬陳兵誓雪仇，韶關高峙古今愁。  
英雄來集鳳凰嶺，士女嬉遊舴艋舟。  
一夜雨聲驚客夢，九齡風度仰危樓。  
眼中滇武清清水，合向珠江不肯流。

悼許地山

瓊島牛津說道殊，天人學究是通儒。  
重洋共渡成知己，香海同遊識故吾。  
曾爲

換巢嗟彩鳳更因綴網泣勞蛛空山靈雨無常悟灌頂何心憶醍醐

流霞 次浦遜生韻

嵐色流霞不可爭天涯把酒幸長征峯高歌樂歡無盡湖傍翠微憶未名每托  
松風邀月影却從春水映星行塗山倘有燕雲意飄泊西南說舊京

隱士 次老舍韻

此是名山隱士家香浮十里水仙茶意行巖壑來迎客閒話桑田勸種麻得句  
便佳心願足獻詩爲樂主人誇丁寧又作晴天約曲水流觴醉日斜

贈鄭曉滄

越山浙水幾留連潭月湖心印萬川譯筆昔曾傳幼婦新詩今又最青年清流  
學海歸宗海磨劍龍泉勝惠泉畢竟沼吳成一快廿年教聚着先鞭

遙祭先祖母 七夕

陳情表上事全非，屬語丁寧願與違。  
黃髮驚癡知健在，白頭瞻望夢依稀。  
千秋銜恨慈烏淚，廿載追懷寸草暉。  
如畫江山逢巧夕，傍林宿鳥又安歸。

鄉夢

次張北海韻

落日橫戈雜嘆吁，歌饒萬里指征途。  
寧憑淡月收鄉夢，待酌清泉認故吾。  
鷗外煙波黿渚白，雞聲風雨獨山孤。  
梅開香雪低頭拜，一葉扁舟泛五湖。

雲上

次華仲塵韻

豪情雲上眞名士，茗椀清談妙入神。  
世事滄桑心事淡，吳山芻狗蜀山新。  
青冥客夢忘相識，白首天涯尙古人。  
四海涼蟾秋氣肅，幾曾一室可爲春。

花谿吟

泛瀑秋溪壩上風，牂牁放鶴問蒼穹。  
考工爲備生民要，開物終參造化功。  
車轍迹途規矩在，書文樂育古今同。  
杞人不識雲窩意，待訴屏簫客夜衷。

花谿小憩

次前谿先生韻

不飲扶桑誓不休，且封茅酒作溪遊。  
秋星河鼓崇儒將，勝日流觴縱客囚。  
但使舳艫千里下，寧辭滄海一身浮。  
黔靈我武鷹揚早，風雨重陽願共謀。

先父六旬紀念十月望日

撥亂興邦夙夜心，冰寒履薄凜淵臨。  
波濤東海鯨鯢沸，烽火南疆盜寇侵。  
萬國旌旗明指掌，滿天星月叩靈襟。  
年年一掬孤兒淚，鬱鬱瀧岡墓草深。

入蜀

次朱佩弦韻

當年入蜀辭家遠，今日江樓又作家。  
離亂遭逢憎世故，浮生排遣託天涯。  
詩書自得林泉致，魚米寧疎市井譁。  
獨笑夷齊忘薇蕨，簞瓢依舊漫興嗟。

贈梁實秋

臘八

少日才華侔儻身，荷花池畔作詩人。  
爲崇古典探幽邃，更疾時流遠俗塵。  
劍利

青光文自伐胸懷新月友相親  
莎翁樂府千秋誦妙譯全編定有神

婦難爲 次佩弦韻

昔日曾傳巧婦辭世人今歎婦難爲  
典釵搜篋憂心戚數米量鹽詫價奇  
久病老翁甘絕食號寒稚子復啼飢  
惟將十指填兒口好睡莫醒吾愛兒

寄梅校長月涵

天南天北坐春風卅載清華化雨中  
澹泊常懷寧遠志雍容每見靄和衷  
誨人不倦宗師樂格物能參造化功  
立雪程門長仰止昆池旨酒倚高松

大理 次明人謝肇淛韻

天際靈風一夜來點蒼山雪壓層嵬  
大唐雁塔千秋峙南詔鷺峯萬象開  
蝴蝶飛花香入夢杜鵑啼樹血成堆  
榆關閱盡三冬月洱海還尋獨釣台

中和寺 次趙司令誠伯韻

嵐光映翠水迢迢湖海清風塔影招上國旌旗重鼓舞舊邦文物未蕭條千巖  
冰瀑雲天挂一棹煙波雪月搖洗馬中和峯頂上半山稚子識歸樵

鎮南

苴水縈迴連九府崇山峻嶺勢參天南疆英武三關鎮西竺交通一脈先物產  
珍奇稱虎掌人文質樸溯龍川承平看是來朝事志乘重修出紀年

壬午

塗山

三過家門身不入塗山難紀禹功年凝雲月待星槎客飛瀑蓮開水洞天試馬  
春郊花自展尋梅雪嶺鳥爲憐中興到眼芳菲好靄靄青峯插暮煙

無端 次沈尹默偶效義山之作

無端難遣奈何天，歷劫浮生又幾年。  
病裏情懷風裏月，夢中消息雨中煙。  
低吟欲吐春絲盡，薄醉微憐燭影翩。  
一嶺梨花驚往事，可堪回首淚潸然。  
人間那有寄愁天，往事驚心又一年。  
倚竹橋邊燈似月，浣花溪上雨如煙。  
銷聲偏聽蛙聲競，息影還看蝠影翩。  
獨立閒階凝竚處，一心無著轉悠然。  
如此風柔日薄天，惱人景色正中年。  
疎星伴我吟新月，秋水隨君泛晚煙。  
敢託琴聲傳款款，悔從帆影識翩翩。  
前生悟澈今生願，靈鵲橋成亦枉然。  
好遣浮生不問天，悲歡離合自年年。  
多情每苦愁如海，無語翻甘夢似煙。  
月顫窗紗傳脈脈，星搖燭影護翩翩。  
春風儘有溫存意，吹入柔懷便悄然。

懷臘戍

豪情誰寄託雲天，難對白頭憶少年。  
四十功名塵與土，大千世界氣如煙。  
戈揮南甸金笳振，彈指東瀛鐵鳥翩。  
邊外忽傳空臘戍，詩書漫卷意潛然。

蘭州節園

清歌妙舞兩婆娑，羨煞諸天有大羅。  
烽火長城愁北闕，玉門古塞弔東阿。  
肅王左相遺風在，羌笛胡笳掠耳過。  
極目飛沙能蔽日，始知樓外卽黃河。

五泉山

贈朱長官翁部長

高會羣賢意氣親，名泉置酒趁良辰。  
人間天上因緣好，一覽衆山面目眞。  
雲湧金城浮碧落，沙飛玉壘護紅塵。  
籌邊爲佐中興業，刁斗分明部勒新。

謁成陵

龍興七百年前事，成吉思汗迴絕倫。  
立馬崑崙懷博望，揮戈定遠靖萊茵。  
大同邴治河山永，五族精誠骨肉親。  
翠柏參天蔭呵護，八方風雨召來人。

蘭州四大展覽誌盛

皋蘭風物至今傳，載籍遺存一輩賢。  
周啓文王師呂尙，漢通西域鑿祁連。  
勵精

圖治千秋業繼往開來億萬年恰好槎橫天上水河清復見月團圓

縉雲山

佳日欣逢大雪臨  
名山秋色耐追尋  
雙松夾道慈雲護  
萬笏參天佛國森  
寶殿傳經宏善識  
靈光掠海起潮音  
誰知世外桃源有  
紅葉相暉翠竹心

汗漫遊踪蜀道難  
興來偶上白雲端  
茶甘仙露匆匆飲  
經證菩提葉葉看  
默禱妻爲姑氏病  
心香我祝母身安  
法尊啓示蓮華妙  
邂逅太虛路半殘

慈雲寺

疑雲疑雨霧中酬  
敢托禪經悟慧修  
世事豈應多挂齒  
夜闌未卜幾凝眸  
萬家燈火天相接  
一葉扁舟水與遊  
常樂當知歸我淨  
且甘落落自休休

恩施懷先祖岳王子泉太守

一門忠孝自循良  
父老猶傳太守王  
杏雨樓前懷趙杜  
碧波泉上歎龔黃  
不教

蜀道成天險，曾禱龍神挽旱荒。詩酒風流耀方冊，七年撫字有甘棠。

國立貴州大學成立贈言

欲樹百年國士才，牂牁今見大庠開。生民拯溺三民教，立德修平八德恢。人定勝天濃霧散，中興到眼濁醪陪。花溪明月長相伴，桃李成蹊手自栽。

癸未

鹿野苑

法輪初轉兩千年，佛國重修鹿野緣。欲渡恆河沙數盡，原知歷劫浩無邊。慈航只待衆生悟，苦海還須各自憐。喜見中華新寺宇，心香一炷告青天。

綺琴台千佛洞

修得今生佛國緣，綺琴台上覓西天。焚師宏法人爭說，石象臨門事久傳。畫壁

早堪經萬劫鑿山瞬已逾千年新栽縱有菩提樹多少癡情不羨仙

愛羅蘭千佛洞

三教源流七百年愛羅蘭洞各相連如來自現蓮華妙釋梵還誇虎步翩怪誕  
侈神山欲舞莊嚴奉佛玉生煙法輪待挽彌天劫舉世滔滔亦可憐

塔琪宮

珍珠瑩潔且留連願結塔琪月夜緣白壁生輝勝逝水青春暫駐永長年情懷  
自訴神天恨淚睫交凝海石穿純美原憑柔愛斷分明隱約兩悠然

寇撻塔

登臨爲仰先王業放眼乾坤勇士風留得忠忱人共見能昭義膽自爲雄靈光  
點玉千金鏤異代蕭條一霎同憑弔巍峨懷聖手天工巧奪匠心中

錫金感懷

我佛誕生尼泊爾不丹炎裔齒唇同雪山屏蔽藏康衛天竺津梁哲孟雄何意  
王師輕出塞徒教藩國失和戎追懷六十年來事漢月依依入夢中

## 甲申

### 請纓

絃歌風雨憶雞鳴漫卷詩書樂請纓四海干戈崇武德八荒藍縷啓文明黃花  
碧血千秋事實劍寒光十萬兵三峽樓船東下日會看香雪上臺城

### 和柳翼老

島寇蝦夷逞夜郎黃龍痛飲指扶桑書生投筆從戎熱國士貢言獻曝狂豈爲  
楸枰爭黑白欲憑肝膽報炎黃整軍經武齊心志民族中興日月光

### 送中大女青年從軍

好男誰說不當兵，好女今朝亦請纓。  
紅玉臨戎振士氣，木蘭報國逞豪英。  
不辭石砮中流砥，寧別沙坪萬里征。  
冬月初圓聯袂去，來年共祝早收京。

## 乙酉

### 哭齊學啓將軍

緬北功偕班定遠，仁安羌外戰雲酣。  
旌旗蔽日千軍擁，風雨同舟一渡難。  
自是精忠追武穆，長留正氣繼文山。  
仰光霧撥天重見，大節昭然淚血斑。

### 沙坪壩喜聞日寇投降

拋却詩囊會幾時，驚人消息耐人思。  
八年涕淚愁何在，萬里江鄉夢亦疑。  
猶喜童心聞捷報，敢忘慈訓誤歸期。  
明朝巴峽樓船下，長跪萱闈訴別離。

杭州 贈朱部長黃主席周市長

一別錢塘近十年孤山放鶴舊林泉雲封天竺藏靈隱堤曉東坡憶樂天潭影  
湖心招嶽翠蘭舟柳外擁魚鮮晦菴山谷酬今昔漫酌太平水月邊

西湖卽景 次方湖韻

掩映六橋三竺雨煙波容與晚秋晴青山歷歷看無恙紅葉年年數有生修竹  
長松天共戴閒鷗野鶴水相盟寒梅自守孤山雪雲插雙峯暮暮情

七絕

庚辰

浮圖關 中秋

雄關今日集羣英涼月中秋處處明  
誓殲狂倭同敵愾浮圖古寺且談兵

辛巳

懷亡女慰慧 用申晁盟韻

避地雲山又一方全家團聚謝穹蒼  
茅廬幼女初周歲喚我聲聲向夕陽  
遊屐方從楚鄂還征鞍甫卸未偷閒  
驚傳阿慧傷眠食如箭歸心度蜀山  
一夜浮雲化作煙疎星淡月幾啼鵲  
無言掌上珍珠落哭女爺娘劇可憐

客病馳思念轉空飛橋遠挂故鄉虹曇花一瞬檀香散夢斷千山萬水中

赤巖寺壁

次蔡公時烈士韻

畫角聲中過此山蔡公遺墨尙人間赤巖一片精忠血大節昭昭豈等閒

天遊

萬方多難愼同仇九曲爭尋百越幽他日烽煙閩海靖武夷重至上天遊

九曲權歌

次朱晦菴韻

遨遊何必乞山靈舊恨新愁一筆清憑仗青天昭白日凱歌聲接權歌聲  
初泛清源放箏船武陵過客問長川虹橋縱斷江南夢肯作漁郎避地煙  
無媿伊川學養深文公精舍在平林何因漢宋爭仁智或失中庸孔氏心  
僕僕征塵涉釣灘雲屏綽約掌中看仙峯慣隱千巖瀑滴翠相期耐歲寒

龍虎山喜雨

留侯世系赤松間，漢壁流霞五彩斑。  
霖雨蒼生天降澤，風雲際會在斯山。

贛州謁王陽明駐節處並柬蔣專員

贛南駐節教純良，共仰先生德澤長。  
識字常關民樂育，陽明遺愛正宣揚。

大庾

流砂眞價勝明珠，萬斛烏金舉世無。  
六月梅關花未發，他年再賞樹千株。

相思巖

相思巖上相思樹，紅豆相思南國知。  
巖下相思江曲折，悠悠歲月總相思。

七星巖

桂林山水夙知名，况有洞天避甲兵。  
大地風雲多變色，七星巖下尙承平。

烏江渡

四面歌聲此水濱，大王意氣絕凡塵。  
含情難語同舟客，零落天涯一美人。

寄奉外舅

風急秋高氣象雄  
葦鱸張翰憶江東  
此生修得湖山樂  
萬頃煙波一釣翁

西陲

咫尺西陲路萬重  
爲迎冰雪願常冬  
御風一日仍吾土  
億萬斯年挺勁松

蕉舍

鬱鬱關山萬木青  
蒼梧翠竹入園庭  
芭蕉早識秋消息  
伴月今宵幾客星

黃菓樹觀瀑

天馬能知造化功  
奔騰萬練挂長空  
秋心瑩澈三千丈  
雨近重陽瀉落虹

火牛峒

田單何處夥琮璚  
深紫竹玲瓏鼓樂尋  
最是一聲驚霹靂  
地梁天柱繞餘音

浮生好遣

浮生好遣託天涯靜對空山傲物華  
獨仰陶公風節勁披星戴月爲黃花  
處處雲山處處家浮生好遣託天涯  
暖香暗動噓寒玉莫負春先幾點花  
已濃菊釀寒香早踏雪名山問素華  
贏得芳心迴大地浮生好遣託天涯

白沙

次夏廬先生韻

白沙江上一帆開話到金陵作計回  
爲問江南好消息梅菴應伴早春來

江村

次孫曉夢韻

江村夜話不嫌遲待旦何妨趁歲時  
總角交情忘別久幾番風雨髮如絲

紅豆樹

大江東去鄉情切浪白沙明醜石知  
細雨還尋紅豆樹漫誇此物最相思

黑石山

聚奎聞說多賢士白屋詩人迴不羣  
黑石山頭遺墨在可堪風雪讀斯文

金殿

圓圓不帝吳三桂金殿何來玉女音滿樹茶花紅似血空教鸚鵡泣春深

黑龍潭

書生壯志靖胡塵投水寧慚投筆人潭泛珍珠龍淚黑素心賴有一枝春

三台山

三載詩情留往事默廬隨筆記清吟推窗依舊湖光好月影松風夜夜心

話眉坪

湖山到夢如鉤月初放寒梅破晚晴豔說畫眉天上事高歌響澈話眉坪

祿豐龍

億萬千年不壞身祿豐龍骨最希珍懸知滄海橫流日族類親疎有幾人

大理和趙誠伯司令

極目扶桑指日休  
蒼山洱海兩無愁  
坐鎮疆圻吟雪月  
平南宿將自風流  
雲上豪遊且放歌  
柔懷密意記南柯  
高情自有蒼山月  
送別征人萬里多

楚雄覆車口占

逐逐征程促早歸  
覆車徒負鑑前非  
死生意外由天定  
檢點詩囊淚血稀

壬午

秋聲次翼野韻

懶賦秋聲秋寂寂  
蒼茫又是夜闌時  
一燈圍坐青山裏  
儘有狂言醉不知

金風玉露 中秋

金風玉露可憐宵  
難得疎星慰寂寥  
愛誦東坡詩句好  
此身無計老漁樵  
千古幽情未易招  
金風玉露可憐宵  
懷人儘有關山月  
夜半清吟逐夢銷

非關人事百蕭條地老天荒飲一瓢不見清輝秋已半金風玉露可憐宵

寄盧冀野

江南才子道南移勝地金雞厄不辭讀易早知天有數詩囊拋却好吟詩

癸未

飛渡天山

白馬騰空三竺還今生又喜渡天山披雲縮地尋常事朝發長安暮玉關

閱微草堂

草堂詩句傳工部塞外風光記閱微雪滿天山輝落日空齋涼月與誰歸

紅廟子

忠烈祠

籌邊豈必欲生還留得丹心照雪山忠烈於今崇廟祀夕陽終古泛紅顏

漢裴岑碑

燉煌太守出雲中  
呼衍誅平意更雄  
斷碣殘碑垂萬世  
三千猛士永威風  
土魯番得隋墓陶碟  
洛浦得欵器盛水適可而正過量則偏

隋時匈奴漢時欵  
盛意慇懃贈得之中  
正不偏容有度立身行事耐深思  
迪化卽事

中原捷報傳邊外  
喜祝元戎萬歲聲  
曲罷霓裳來鼓舞  
木蘭報國願當兵  
孚遠

唐城宮闕隋城墓  
知己緣逢木乃伊  
重見青天肝胆白  
千年名士莫相疑  
惠遠城

昔日將軍鎮九城  
今過惠遠客心驚  
邊防有賴全民教  
長勝匈奴百萬兵  
伊甯贈周至柔將軍

飛雲撥霧雪山邊，鑿空曾傳大宛先。  
伊麗婀娜猶在耳，將軍已上九重天。

### 伊犁卽事

芬芳蘋果艷玫瑰，馬上琵琶醉玉杯。  
黃髮垂髫多喜悅，桃源此處問津來。

### 海心山

仙島從知海有心，蓬萊玄女自情深。  
天池弱水輕飛渡，爲舞敲冰碎玉音。

### 塔兒寺

黃教祖師宗喀巴，三千弟子盡袈裟。  
遠從蒙藏朝青海，灌頂醍醐共一家。

### 塞外江南

未夢江南尋塞外，已隨明月到南疆。  
故人爲說陽關道，此去陽關路也長。

### 焉耆

昔日可汗夜點兵，旌旗萬里作長征。  
焉耆駿馬今猶健，百戰功勞孰與京。

輪台

蒼茫暮色接輪台白雪放歌細雨來趕集陽霞人又散綠楊無語喜君回

龜茲古渡

古渡龜茲懷舊葉白楊烏壘總相思參天似有安曾語帕夏當年禮拜時

冰達坂

雪地沙天冰達坂樊師西域記曾遊爲朝三竺通姑墨度得凌山願亦酬

阿克蘇

阿克蘇城縈白水古州溫宿最豐收稻梁儘足三年食更有瓊漿日夜流

香娘娘墓

不事君王思故土飛泉疏勒是家鄉香風十里安魂處千載琵琶骨自香

英吉沙

戈壁已教成沃野蘊藏煤鐵足堪誇從今莫怪崐崙黑富國強民意氣賒

### 明鉄蓋山口

佛國津梁明鉄蓋載經白馬此曾來蒲犁今日重通道愧我乘風天上同

### 莎車

莎車新作雙城會舊屬猶傳葉爾羌大布飄旗揚黨國薰風拂面送荷香

### 喀喇崑崙山口

喀喇崑崙通古道晉僧法顯啓前緣層層曲曲冰天上白雪峯頭積萬年

### 崑崙頌

中華民族始崑崙黃帝傳來盡裔孫帕米高原開造化南山東海定乾坤

### 和闐

中華自昔稱絲國螺祖前功萬世珍今日不誇和闐玉桑株白雪裕生民

洛浦

大小胡麻尋古邑鄉人指點各西東不知秦漢唐時事多少樓蘭入土中

皮山葉城道中

行來地闊天空處已是黃昏日落時瀚海闌干雲黯淡黃沙白骨起幽思

玉河橋

跋涉關山萬里迢今朝喜渡玉河橋辛勤終歲欽修治自裹餽糧自飲瓢

巴楚露宿

孤星伴月月如鉤席地幕天志可酬萬里長空雲是主六年聖戰憶蘆溝

玉爾滾

大樹將軍留往迹垂楊村裏少人家野店空餘詩句在可堪歷劫話桑麻

庫車

樂教詩風萬衆和能明招送自婆婆萬人爭賞庫車舞爲唱中興破陣歌

### 鐵門關

鐵門關上遠人柔哈滿溝頭拜冕旒依舊開都河曲折一江漲瀑向東流

### 庫木什

野店孤燈不掩門亂雲飛雨到銀村醒來臥虎山頭客定到蛇湖醉一尊

### 吐魯番

馬邑龍堆溯玉門車師故道漢時存葡萄仙子今何處天上蓬萊海底溫

### 坎兒井

海溢蒲昌見陸沉高昌城闕尙堪尋林公澤惠坎兒井瓜果長春草木深

### 地北天南

地北天南曾幾時相逢千里託相知明朝有客寫崙去傳語還憑馬上詩

甲申

磐溪

爲尋飛瀑到磐溪  
漢闕巍峨試品題  
回首隔江燈火裏  
絃歌風雨伴金鼙

乙酉

受降觀禮 九月九日

受降台築紫金山  
八載艱辛奏凱還  
雪盡馬關奇恥辱  
功成觀禮我隨班

喜聞婉靖舟發漢皋

夔門一瀉平天下  
千里江陵蜀道還  
入口揚帆猶少我  
寒窗聽雨打孤山

蕉  
舍  
詞  
稿

# 蕉舍吟草卷二 詞

沁園春 遙祝 慈親六十壽 次放翁韻

乞巧中庭明河在天倦眼旅人憶曉月蘆溝白虹黃浦經年烽火匝地煙塵妻  
子相隨家鄉遠別佳節難爲不夜春任歡笑且茅廬話舊蕉舍吟新 思親暖  
暖慈雲恐白髮愁添老病身願康疆逢吉籌增鶴算天常行健兒自安貧小步  
梅園輕舟黿渚歸去魚鱸更采蓴承平樂看錫山無恙金母爲鄰

## 百字令

大江東去消磨盡多少英雄豪傑顧曲周郎千載後擊楫空懷赤壁蜀水長清  
吳峯永翠恰好當頭月人生一夢江山一片如雪 回憶血戰經年長空萬里  
警報聲聲發入地升天雲黯淡仰望疎星明滅夜半醒來依然故我舉手搔華

髮來年歸去清風兩袖何物

滿江紅 十萬英雄

十萬英雄待東下千里舳艫驀回首白門楊柳來舞巴渝神女漢皋遺玉珮鮫人南海失明珠更堪巫峽聽猿啼長歎吁從天竺通險途定滇右啓雄圖駕戰車收復桂柳蒼梧飲馬湘江馳鄂渚揚帆三水到番禺看會師瀛島滅扶桑還上都

滿江紅 次岳武穆韻

倭寇興戎騰殺氣幾時銷歇隨處有仁人志士犧牲壯烈寸寸黃金雞塞土森森白骨蘆溝月好河山終不讓人侵心頭切馬關約恥須雪高句麗恨曾滅受降台重築紫金山缺一代凌煙燕許手千秋流碧蓑弘血看今朝大纛引神鴉瞻陵闕

滿江紅 次薩都刺韻

何日收京凡血氣同聲歎息從此後臥薪嘗膽痛懲平昔盡瘁鞠躬諸葛亮嚴  
明刁斗程不識待樓船千里下三巴東流急 天下事猶梭織循環理尋陳迹  
只精誠團結一心殲日富士高頭孤月冷櫻花叢裏嬌鶯泣到其間賸見火山  
紅瀛洲碧

滿江紅 古城烽火 次劉冰叔韻

瓊島瀛台斜陽外荒煙蔓草空悵望古城烽火燕雲歸鳥故國河山留半壁何  
年戰伐平三島願中華兒女誓同仇仰天嘯 蘆溝恨終須報奸僞恥還當掃  
歎衣冠禽獸覩顏啼笑無定河邊多慷慨妙峯山頂興征討要驚天動地與人  
看黃龍搗

驀山溪 青年從軍

教崇射御禮樂和書數六藝備成材好男兒經文緯武唐隆宋替積弱近千年  
黃龍取金甌補還我河山主 龍蟠虎踞王業恢明祖革命覆清廷建共和羣  
尊國父元戎抗戰領導我青年從軍旅爭先赴忠勇今猶古原歌作萬里長風舞

御街行 送出征將士

紅搖燭影流光轉細語輕良宵短男兒志氣展凌雲且把柔情輕遣筆兒投却  
中兒焚去赴敵爲君錢 一聲畫角催人散樽酒滿胸懷煖今朝休更悞行期  
但祝前途平坦金戈鐵馬千山萬水珍重青春伴

、離亭燕 大吉嶺

日出須彌峯下白雪放歌閒話大吉嶺頭誰是主劍影寒光爭瀉佛指現華嚴  
隱約茅廬蕉舍 天竺三祥雲如畫西域盤鵬輕射蕃漢一家稱盛事普照閭浮  
天大壯志薄雲霄明月清風無價

千秋歲 嘉陵江上 次謝逸韻

寒蛩鳴砌斷續秋聲細紅葉落西風起松分霜露白竹掩泉湖翠斜陽醉孤帆  
遠捲征夫睡戎馬關河寄兵甲風塵洗明月下青山裏尋梅香滿袖訪鶴欣  
聯袂朝霧散一泓初漲嘉陵水

唐多令 壽翰仙內兄五十 次陳允平韻

慷慨對西風高歌在客中看秋來葉落梧桐瘦損芭蕉憔悴月青嶂裏醉霜楓  
元日喜春逢舉杯情更濃趁寒梅香溢三冬瑞雪飛添酬兩鬢華燭耀歲朝  
紅

臨江仙 宿草

宿草寒煙朝霧散白雲望斷峯青蓬蒿荆棘路難平崖懸梅倒發石壓笋斜生  
夢裏山川身是客微波蕩漾嘉陵扁舟誰與五湖清今年元夜好明月是歸

程

臨江仙 慰民湯餅日作

白鳥青峯依綠水，泉溫記問山。  
艷農莊蕉舍舊茅廬。縉雲堆采玉，  
巫峽獻明珠。春意闌珊新雨後，  
天公善與人圖。兒田好種樂書蔬。  
田能收稻麥，字使識之無。

臨江仙 清明

綠到芭蕉消息換，焦桐響協雲和。  
鵬飛蝶夢費張羅。鴻泥留北極，蟻穴覓南柯。  
又是清明時節雨，青春躍馬橫戈。  
但能洗眼俟黃河。還鄉先掃墓，涕淚出樵歌。

鵲踏枝 四十自壽寄婉靖

四十春華人未老，但託平安不問靈蓍。草聞道今年消息好，蒼松翠柏同爭笑。

辛苦吾妻安逸少兒女成行都仗娘懷抱卻待家園桃熟早朱顏白髮還相  
禱

鵲踏枝 斜陽

片片斜陽帆去遠獨上層樓點點牽人怨白鳥青峯誰與伴江風春月年時換  
夢裏花開吹又散襟上溫馨枝上思量徧難得花前匆一面金波宛轉游絲  
限

鵲踏枝 白雲

浪逐飛花蘭櫂遠柳岸維船不繫青春怨一曲清歌仙女伴白雲無妒天心換  
鳳蓋華旗虹彩散人去黃昏月照關山徧水漲平湖風皺面橫空雁落沙洲  
限

一剪梅 先父六十紀念

雲黯靈樁廿五霜縹緲音容孤苦諸郎鵲鴿原上惜分颺望眼天邊愁老親娘  
萬里征程我方春盡祁陽雁斷衡陽藍田偶說惠泉香客裏江鄉夢裏家鄉

鵲橋仙 中印因緣

開來繼住金聲玉振孔子道惟忠恕因緣巧合妙蓮華釋迦佛生於印度 金  
人示夢高僧西至白馬載經無數今朝奉使隔千年願彼岸慈航普渡

南鄉子 春山

曉枕不成眠黃鳥催人起捲簾莫怪清明時節雨窗前後晴虹雨後妍 千  
里共嬋娟爭說天長地久難夢裏分明今夜月團圓淡淡春山獨自看

南鄉子 春意

清淚濕羅巾鸚鵡當前不敢親千種思量何處寄溫存春到人間萬事珍 一

曲盡天真燕子呢喃且禱神鄉女相逢還訴說焦人雨打梨花也是春

南鄉子

春寒

細雨淅輕塵魂斷行人柳色新殘夢依稀珍重數三更天放桐花凍得成玉  
笛暗飛聲散入東風一夜清過客桃源何處覓分明黃髮垂髫問武陵

鷓鴣天

哀慧女

次稼軒韻

將信將疑失掌珠癡來我欲問山巔復甦願信三更夢一別方疑萬有無尋  
貝葉訪浮屠何如歸去結茅廬心香一炷蒼穹禱早引吾兒忘老夫

鷓鴣天

茅廬

北碕溫泉衆口譽長年山客究誰渠每拋一葉摩遺洗卻上層台問太虛過  
惠宇入茅廬喜蓮林裏客來疏鄉童偶道城中事不顧漁樵又讀書

浪淘沙

塞外江南

美玉早濡涵無意尋探南山白雪積層嵐雪水抽絲絲潔白遍地桑蠶 上下  
古今譚對影成三平沙淡月夢初酣爲夢江南尋塞外塞外江南

浪淘沙 喜雨

估曲度蠻關淚滿雲寰雪峯今日未開顏預卜湖湘連歲稔喜溢人間 爲慶  
澤霖頒故緩歸還願天吹雨到巴山省得荆妻多訴說米貴薪艱

醉花陰 南泉病中

燦爛朝霞開宿霧悔作孤城戍歲歲待春來竹報平安輕遣年光度 纏綿病  
榻歸期數休勸斜陽駐一夜雨窗寒夢斷殘更怯向梅花訴

南歌子 賀潛廬新居

卜築山中隱涼生松下筠千言吟筆草堂新更喜出門一笑大江陳 離亂交  
情好艱難共味辛一般孩氣一般眞誰說今秋一室不爲春

西江月 祝慈親五十九壽

翠柏蒼松不老庭萱慈竹常依征途無計賦來歸金母銀河獻瑞  
鶴算重添  
東海凱歌早漾春暉明年花甲舞萊衣酒滿家園共醉

西江月 鄉夢 次翰仙韻

高唱大江東去傳杯兩地歡顏月圓人壽蜀山灣明德依然無間  
客裏又逢  
花好夢中已見峯彎峨嵋作別故鄉還共飲梁鴻溪畔

太常引 遙祝外舅壽 代內作

秋涼新月憶湖光旨酒惠泉香杖履祝康彊古稀壽添三晉觴  
自從嫁後久  
違定省離亂未還鄉孺慕總思量願鶴髮童顏駐長

武陵春 曲江

瀟武雙溪來洗眼風采上高樓南浦珠還不繫舟夜渡客生愁  
遙聽清江如

怨訴曲曲付東流南向珠江不肯流待湔盡虎門羞

武陵春 南華寺

大舜薰風從此處韶樂問何之古寺鐘聲夜半遲律呂老僧知  
釋梵六祖自宗師歷劫韶關再誓師快趕走蠢倭夷 秋水南華宏

添字采桑子 蕉舍 次易安韻

前人種得芭蕉樹入我園庭入我園庭一點清心難道不知情  
搖曳雨過天青雨過天青只有啼鶻喚我晚來聽 松風竹影山

添字采桑子 離情

送君萬里丁寧別月在清空月在清空莫使兒曹知我怯離衷  
誰寄且付征鴻且付征鴻託汝音書一箭掠蒼穹 憂心匝月憑

清平樂 次喬大壯韻

鴛鴦情重千載青城夢打虎山頭桃花凍艷說人間釵鳳  
離堆早鑿岷江樓  
前濯錦流長海內新詞傳誦好修續志華陽

好事近 自由中華

庚子記重逢甲午輕輪無補回首瀋陽秋盡又申江春雨  
百年恨史此勾消  
自由共爭取尙有大同新曲待萬邦來舞

訴衷情 錦石鄉卽事

田中缺水怨溪河情急是新荷無妨佛脚來抱禱雨救嘉禾  
喧鼓樂打官鐸  
響聲多多勞菩薩且問蓮花夜雨如何

卜算子 金城江夜宿

回首憶皋蘭臘雪天飛綽爐火融融燭影紅哈密西瓜妙  
今夕宿金城新月  
臨江皎流水無心暑氣消還是浮甘好

卜算子 送沈宗濂入藏

玄奘別長安不計流沙阻白馬馱經風世緣西藏長征去  
天然與君還又送  
君飛渡回首青雲萬丈峯春雪依人處

菩薩蠻 永安夢慧女復活

依人小鳥來尋夢客中欲信還疑空衡雁乍相親家書隔五旬  
哥哥勤學早  
阿姐嬉遊好小妹卻無依溫泉浴未歸

霜天曉角 桂林卽事

灘江晚照戲水人喧噪個個如魚歡悅船來去幾聲櫂  
詩好詞絕妙誦吟渾  
欲笑卻把啼猿驚起奇峯處一聲嘯

浣溪紗 次于院長右任

雪浪松風海月遮來鷗去雁片帆斜白雲深處鶴爲家  
秋水有心知勁草春

泥無力護殘花從來咫尺隔天涯

浣溪紗 再用前韻

青木關頭竹影遮溫泉寺裏夕陽斜  
米珠薪桂歎爲家 日月無心雲出岫江

山有語浪淘花任他海角與天涯

浣溪紗 山茶

艷說人間謫醉仙  
鬢花凌亂夕陽邊  
如荼如火壓芳煙 嬌女新詩聲歷落茶

山舊夢舞蹁躑  
杏桃還讓白華先

點絳脣 恩施道中 次張廳長伯謹

皓魄當空照人野  
店停留處楚雲巴  
霧歷盡關山路 幾度冰蟾好景成虛負

儒冠誤枕戈心緒  
刁斗聲聲訴

點絳脣 恩施贈陳長官辭修

百戰聲威粵中湘北騫旗處羽書飛霧報捷荆宜路  
成竹在胸際會容輕負  
前非誤反攻就緒勝利因君訴

相見歡 春雨

繚繚度日如年意闌珊無奈桐花依舊凍春寒  
關不住紅無數雨窗前恰是  
一園春色到人間

如夢令 庚曲道中

經月櫛風沐雨卻喜坦途歸路入夏過梅關不見花開千樹前去前去問曲  
江何處

江南好 婉靖生日

元宵後恰喜值良辰紅燭團團燈裏月黛眉深淺畫中人皓首兩相親

附曲四首

一半兒

塗山今日有遺苗神禹當年洪水消奇蹟龍門接海潮上雲霄一半兒天工一半兒造龍門

離堆千載逐波搖川主馨香父子標小步青城竹索橋水迢迢一半兒神奇一半兒巧離堆

湘灘分水各千條史祿靈渠好作橋大漢伏波功業超話漁樵一半兒童謠一半兒老靈渠

廣陵散絕玉驄驕武肅錢塘怒射潮潭影西湖一葉漂冷瀟瀟一半兒山光一半兒曉錢塘

木蘭花慢

次楊公庶韻

紫金山色好任紅葉落  
闌珊憶霧渡巴江雲遊三竺雪下天  
山跨駝峯須彌直上望河清飛出玉門關  
漂泊嘉陵作客八年淚濕征衫  
相看白髮與童顏  
荼苦又梅酸託兩地清風  
一天明月珍重霜寒嚴  
天天寒地凍勸高眠  
翠被莫輕翻且聽行雲流水清音響過塵凡

蕉  
舍  
詞  
續

蕉舍吟草卷三 詞續

六州歌頭 拿破崙墓

重瞳項羽功業敗垂成烏江渡虞歌裏楚歌聲黯傷神追溯當年事天亡我非  
關戰邯鄲役鴻門宴並光明力拔山今蓋世英雄夢豪氣縱橫看拿翁繼武歐  
陸起風雲笳鼓爭鳴一洲驚問萊茵水阿峯雪經離亂幾飄零時徒失心猶壯  
犯羶腥作長征黑海邊頭白天寒苦戒窮兵烽火滅瘡痍滿恨難平憑弔巍峨  
故墓名王像想見旗旌怎黃沙白骨空有淚如傾劫後傷情

賀新涼 惠泉 次梅墅韻

結草桃花勝有高僧普眞性海汲泉煮茗風送幽篁湖匠巧編竹爐兮松嶺試  
超逸白雲仙徑漁隱溪山猿鶴伴孟端圖聊寫茶煙剩九龍嘯二泉應 流霞

飛閣垂虹暝笑梁汾去梯玩月影留明鏡一曲情溫傳塞外季子平安難問想  
側帽填詞夜興如夢峯巒醒復醉積書巖彈指韶光景鍊石補瀾塘詠

摸魚兒

秋聲 次稼軒韻

更難收莫愁煙雨磯頭燕子飛去秦淮凝碧鍾山紫霜葉棲霞無數秋勿住弔  
井底胭脂寂寞台城路江山不語問花落花開花殘花好非霧亦非絮 楸枰  
裏不道蒼生盡誤幾番風月相妬陰晴圓缺風知否離合悲歡空訴風莫舞怕  
亂葉隨風席捲中原土興亡最苦且共撫危欄秋聲環繞更上一層處

水龍吟

謁蕭伯納翁後作

蕭翁還似莎翁人間何世終堪說有情如願空忙無事詩思雙絕凱撒雄圖貞  
姁壯志幾番周折比莎翁半百蕭翁九十巍然叟飄銀髮 廿五年來試筆寫  
孤鴻寒窗飛雪荆卿易水蘇卿北海千秋英骨武穆精忠雷峯照寂浣紗溪碧

望古城烽火承平願滿祝豐年月

水龍吟 海外歸來

劍橋那似牛津劍橋兩地難分說牛津豪放劍橋堅實益彰相得哈佛崇文  
工尚理服膺心折既鵝鄉懷古蕭鄉踵謁文豪識人中傑不怕江南秋盡怕  
風吹故園枝節金波宛轉玉繩低黯那能長別秋色難分七分黃葉三分明月  
滿天飛只待梅花點點釣寒江雪

水龍吟 海上飛船

似鷗還似非鷗翩翩柔翼飛還墜披雲玄鶴點波蜻蜓神遊天地雁跡遼空鴻  
泥蓬島瑤台深閉儘翠嵐擁雪朱霞吐日垂垂玉鉤飄起回首太平飛剪掠  
天風重洋虛綴東經弱水裊瀛烽火珍珠爲碎西越駝峯須彌直上崑崙容易  
待地中海上雲端怒吼灑蒼龍淚

水龍吟 臺灣 次陳定山韻

首陽薇蕨能甘受降赤嵌增豪氣曉光東海落霞西嶼澄台安寄鹿耳春潮沙  
鯤漁火紅毛番戲趁杵歌聲裏婆婆起舞羅伽女神仙侶 卻看天開南極隱  
蛟龍雲沙無際烟生日脚冰寒月窟鯨鯢千騎流水渠成高山族聚翠凝香寺  
喜梅花纔放荷花便見古東溟地

南浦 珍珠港

澄清海宇看太平洋上湧金門天際人間星火點點耀銀村瀛島匆匆飛渡憶  
櫻花時節雨紛紛跨跨驚濤駭浪風馳電掣暮霧逐朝雲 明媚檀香山色念珍  
珠破碎黯銷魂世外桃源相問豔舞草羅裙醉酒狂歌歡夢又誰知此處舊創  
痕捲翠屏猛憶愁眉秋月正黃昏

南浦 迦蘭河

和風暖日問青春底事不淹留十八年來長別難覓舊時秋獨步迦蘭河畔訪  
劍橋只爲故書樓憶名師老友山光雲影映雪月如鉤拋卻白宮華表樂樵  
遊作伴賞花州一樣田園風趣閒話散鄉愁鉄馬金戈猶昨向天涯薄酒自溫  
柔可堪伊瘦損清神不醉也凝眸

慶宮春 金陵月 次清真韻

虎踞獅峯龍蟠牛嶺大江一片濤聲故井胭脂勝朝金粉淒涼風雨雞鳴十年  
長別青青柳絲絲繫情塵埃寄旅寂寞黃昏落日台城堂前燕子將迎怨徹  
啼鵲笑到流鶯淡淡微雲幽幽空谷銀河黯黯雙星人間天上曾相憶靈橋鵲  
成當頭明月殘夢依稀一夜風清

木蘭花慢 秋山 次稼軒韻

團樂今夜好憑高處對秋山任玉兔遙升金蟾低轉俯仰人間樓前更誰悵望

託風雲萬里倚瓊欄天上霓裳一曲嫦娥掩袖雙鬟  
鏡花水月夢中看杯滯  
暫爲歡數馬背琵琶灞陵別後幾度陽關邊塵拂風細柳念故遊回首是長安  
華髮欺人漸白天山飛雪吹寒

木蘭花慢 重九 次稼軒韻

霜林秋愛晚期皓首祝華年插重九茱萸金風挺秀玉露盤圓南山酒濃菊釀  
趁月明江上放樓船舞罷蓬萊池畔歌餘鸚鵡洲前 光華日月自經天古聖  
與先賢復上國衣冠河山依舊東海無邊振衣又來嶺上語匡廬九老共欣然  
白鶴洞天獻頌播聲鳳竹鷗絃

東風第一枝 秋虹 次史梅溪韻

薄雨飛虹涼風零露乍難將息寒暖殘荷玄武秋深衰柳秦淮意淺枝枝葉葉  
待冬盡垂絲春輭儘多情宛轉嬌鶯驚起磯頭雙燕 但尋遍天涯青眼淚珠

掩琵琶半面五湖今夜扁舟何處瑤台仙苑酒闌夢醒且偷覷香痕一線願明  
日鴻雁歸來卻寄新聲如見

聲聲慢

中秋 次稼軒韻

辦香初繞綵燭還雙天上幻影重重擁出層霄雲浮七寶玲瓏人間多少歡愛  
慰相思越女吳儂散花處看嫦娥起舞桂殿蘭宮 一夜平分秋色歎金波玉  
露夢短情濃漸覺蘆花吹露白蓼染霜紅可知此夕何夕倚高樓掃葉寒風人長  
久月常圓都在畫中

八聲甘州

巴黎聞歌

悵西風不管老征鴻搖落幾天涯恰畫樓雅集明珠蘊玉落雁平沙響遏行雲  
流水鶴嘯遶朱霞何必秋聲賦唧唧興嗟 更有琵琶奏怨寄相思紅豆香弄  
梅花待簾鉤映月遠翠暮煙遮聽佳人清歌一曲儘無端錦瑟度春華笳聲起

陽關三疊那裏人家

燭影搖紅

懷清華故友 次黃季寬韻

水木清華晚荷風捲嫌池小紅搖燭影寄新詩楓葉題多少廿載塵緣未了翠  
微峯禪林投鳥蓬山飛渡碧海縈懷白雲夢繞 醉舞昇平暖香飄雪迎春早  
大江春水向東流兩岸青青草不待月圓花好道閒情良宵共老幾番樵唱幾  
度龍吟幾聲猿嘯

滿庭芳

巴黎中華畫展

鉄塔聳天凱歌動地巴黎碧水晴空楓丹白露秋意夕陽濃昔日朱闌玉砌笙  
歌外去雁歸鴻飛泉湧名王宵獵騎火入雲松 沙龍最超逸羅浮仙侶翰墨  
神宮寫梨孃心事環珮生風向晚蒼穹默禱耕耘好收穫天工人陶醉中華藝  
術妙筆化西東

水調歌頭 聖女峯 次東坡韻

冷落中秋節，高處覓穹天。且來聖女峯頂，把酒問流年。卻喜惠風晴暢，直上瓊樓玉宇，踏雪碎冰寒。氣薄流雲脆，咳唾落人間。黃花傲黃葉，瘦待冬眠，不知今夕霜露月。最故鄉圓翠。柏蒼松交拱，白雪青雲迴護，終古一嬋娟。所願天長，久人事不難全。

水調歌頭 日內瓦

秋月一何皎，萬里照長空。旅途鄉思歸夢，盡付畫圖中。情放拜輪豪句，浪逐盧梭仙島，貞雪白朗峯。湖山依然碧，峯白夕陽紅。干戈起，烽火裏，英雄人。多少離散落葉捲西風。不見當年歡笑，但聞今朝愁苦，遍野是哀鴻。四海一家，好盟誓記重重。

江城子 江南簫鼓

飛霜飛雪老蒼松  
路千重夢千重樵客谿山深處度隆冬  
方寸桃源身世外  
蘋果綠荔枝紅  
江南簫鼓又東風  
曉來峯晚來鐘  
春到人間處處月  
明中無限雲山無限思  
煙柳外海天同

唐多令 悼翰仙兄 次陳允平韻

翰墨寄清風  
幽情入畫中  
撫琴心韻靜  
梧桐修竹長松  
仙客去巫峽  
月蜀山楓  
何日再相逢  
此生愁已濃  
十年來長共寒冬  
忍灑吳峯秋淚  
老蘆葦白蓼花紅

菩薩蠻 駕湖 次牛嶠韻

駕鶯水濯駕鶯錦  
駕鶯湖裏駕鶯枕  
塔影晚鐘聲  
紅粧艷曲鶯  
秋林雲漠漠  
菱角蓮花落  
醉月此生拼  
舟迷煙雨歡

點絳脣 瀛島

瀛島成墟朔風飛雪嫌春早斜陽芳草國破憑誰弔  
綠到芭蕉儘把櫻花惱  
春眠曉落紅多少夢也江南好

訴衷情 秋心 次顧笈韻

玉骨冰肌仙綽約覓知音眉月淡宛轉夜沉沉  
夢裏也相尋薄雲衾化我心  
爲秋心盈盈秋水深

江南好 壽田漢五十

思南國一夜話蘇州湖上咖啡悲旅伴秋聲風雨賦歸舟月印古潭留  
琵琶怨情探麗人殷兒女英雄莎樂美漁歌江漢卡而門梅雨亂鐘紛

金縷曲 悼喬大壯詞人 次飲水詞韻

吾道斯窮耳任飄零草堂風範華陽門第金石文章君獨擅夢筆  
蒼天有意甘寂寞不求知己西蜀東溟吟嘯處向吳江一灑湘纍  
淚身未惜心如水平陵記取燈筵醉照美髯吳興兼士天胡同  
忌接席沙坪前日事分手匆匆已已逢夜雨巴山須悔返棹白門  
重結約把餘生都付絃歌裏然諾在君應記

蕉  
舍  
詩  
續

蕉舍吟草卷四 詩續

五古

癸未

蘇武牧羊歌

十年持漢節出使來遠方  
歸心付落日愁思寄牧羊  
北海寒風緊天山積雪颺  
山海隔中州悠悠不能忘  
牴羊失其毛毛脫還復長  
節旄日凋敝零落我心傷  
亡羊悲日暮暗暗訴衷腸  
誰憐失羣者四顧我徬徨  
皎皎明月夜俛仰自蒼茫  
不見江漢流但見浮雲翔  
四時更變化兩鬢添新霜  
愴懷思故國何日見君王  
年年守漢節迢迢在遠方  
落日歸心絕牧羊邊地荒  
渴飲冰屑寒飢餐雪花涼  
飄零何時已涕泣淚沾裳

遊子吟（擬蘇武作）

大王待我厚公主篤情深情深不知報寧非木石心溫柔復天真公主我所欽  
桑榆倘不變萬里感知音歎我命運乖結髮自有簪好鳥擇枝棲獨木不成林  
胡爲徒咨嗟不忘遊子吟恩意何所託將心寄鳴琴

出塞行（擬李陵作）

匈奴侵漢地將軍出塞征單于兵十萬勢如暴雨傾我有六路師約會在天明  
五路迷失途悵望嗟晨星我有五千衆英勇孰與京跋涉多疲乏步馬難相爭  
奮臂呼將士將士齊請纓拔刀指敵虜敵虜爲屏營天地同震怒殺敵頭顱輕  
戰士多飲血單于欲退兵誰知有奸賊洩我虛實情兵窮箭亦竭功敗於垂成  
我祖本飛將神兮莫鑒臨吁嗟乎我被虜兮身受辱欲報漢德兮空有心念虛  
死不如立節兮耿耿孤忠兮誰爲明

男兒行（擬蘇武作）

自我入匈奴於今十二秋年年望故國有志不能酬  
子從窮途來七載忽沉浮  
漢家恩澤深胡爲事仇讎將軍百戰功胡爲效楚囚  
男兒皆有死馬革勝封侯  
生聚非所望我心恨且愁

雙星歌

雙星在河漢脈脈若有言相看兩不厭不知幾萬年  
織女與牛郎隔河望眼穿  
多少相思意盈盈一水傳欲飛身無翼欲渡河無船  
安得跨長虹天上結良緣  
靈鵲來相慰展翅翩翩爰在鵲橋上相會語纏綿  
一年不相見欲語又無言  
溫存今夕好終古長愛憐年年橋上會依依並蒂蓮  
相逢盡歡樂何必羨神仙

織女行

依依看牛郎常伴織女行春意漸闌珊好夢未分明  
遙遙銀河長星星如繁英

浩浩天海遠相隔太無情願爲雙飛鳥偷渡愛河津願爲比目魚無須恨海平  
皎皎明月夜郎女兩相親牽牛復何求盈盈一笑傾

同心樂（改蘇武作）

骨肉緣枝葉襟聯亦相因姊妹匹兄弟兩對同心人願作連枝樹親愛終此身  
願爲鴛鴦與鴛不負此良辰從茲長相近不分胡與秦男女重意氣恩情日以新  
盛會難再遇佳偶作嘉賓共進盈觴酒所以樂天倫願多留斟酌聚此平生親

萬里緣

今日良宴會歡樂軼凡塵彈箏奮逸響新聲妙入神恩愛無多言知音識其真  
齊心多所願脈脈意未伸人生寄情愛白首付相親萬里結良緣三世有前因  
織女常伴郎談笑摘星辰

叮嚀行（改蘇武作）

恩愛爲夫妻燕婉兩心知歡娛記夙夕離別在須斯胡馬依朔風征鳥繞寒枝  
參辰皆已沒去去從此辭道遠山河阻會面未可期叮嚀復叮嚀相對淚如絲  
努力愛春華莫忘歡樂時生當復來見死當長相思

恩愛爲夫妻燕婉兩心知歡娛記夙夕離別在須斯在天比翼鳥在地連理枝  
生當長相憶死當長相思

## 丙戌

壯遊 次少陵五十六韻

往昔十三四壯遊始北場清華秀水木晨夕意氣揚文學新革命涅槃敷鳳凰  
池畔詠紅燭羞澀我詩囊芝蘭與茉莉孤鴻訴熱腸碧雲護檀栢鬱鬱西山蒼  
濟濟原多士大同東海茫皎皎中秋月重洋送遠航舟行起海嘯浩劫到扶桑

天地忽震怒東京一炬荒劍橋來作客五月薔薇香虹飛江上瀑雪月映寒塘  
弟兄欣聚首懷椿淚浪浪相勵在工業實學棄詞章南海巨星殞海外我皇皇  
大江東去海舉國咽淒涼百年鴉片辱馬關恥豈忘同學多年少結伴各還鄉  
或者執教鞭桃李滿門牆或者參政事品位立朝堂通才兼碩學著作放言狂  
我歸穿歐陸白山黑水旁春日江南麗冬月叩雲岡踏雪尋青塚試馬射馱駘  
漠漠長城道綏遠復新疆難忘九一八敵騎犯瀋陽男兒齊解甲傀儡立廢王  
我上雞鳴寺長白黯無光太息新華夢稱帝覲冠裳五四青年起我亦立昂藏  
翩翩張氏子酣舞醉霞觴高歌寒易水蕭蕭悲白楊壯哉一二八我送兵馬忙  
淞滬四十日軍退民受殃南雍方教誦首都遷汴梁熱河如果卵豈止東北亡  
北上辭京華欲築長城長燕雲淡千里烽火南天望塘沽簽協定冀察嗟炎黃  
青年相對泣故都撤戎行我輩言誅伐野心揭虎狼國難日嚴重強鄰日跳梁

元戎夢宵旰，淬厲挽膏肓。航空謀建設，學術探鷹揚。廬山預海會，血淚裹瘡瘡。  
一心復一德，異夢豈同牀。精誠首團結，明恥莫悲傷。泰誓與湯誓，周武繼少康。  
厲兵而秣馬，聽命於中央。蘆溝抗戰起，英俊來四方。文武教合一，氣宇始軒昂。  
請纓爲報國，浴血最流芳。八年神聖戰，胡馬飲滄浪。三竺長征返，崑崙耀雪霜。  
忽傳原子彈，奇蹟更非常。我來觀落日，瀛海直飛翔。

附歌二首

明月歌

明月皎皎兮雲翔星稀月白兮夜長夜長夜長星星依依戀月光月光盈盈牽雲裳

銀河橫亘天中央牽牛織女兮那廂那廂那廂長年相對苦相望莫負今夜好時光

山川如畫天一方青春如夢兮徜徉徜徉徜徉有美一人兮芬芳願得君子共一堂

星星依依戀月光月光盈盈牽雲裳雲裳雲裳星星稀月白兮雲翔明月皎皎兮夜長

弓兒彎

弓兒彎彎胡馬驍又要馬兒跑又要馬兒不吃草胡兒射雕本領高只是贏不了姣姣

月兒彎彎胡女嬌又要女兒俏又要女兒不撒嬌胡地少年她不要要把漢家駙馬招

身經百戰萬里遙誰家駙馬標單于曾把李陵挑從此漢胡兩和親戰馬不鳴風蕭蕭

十年匈奴漢節凋誰比蘇武高父王要把駙馬招只恨漢家早有婦月兒彎彎待明朝

眉兒彎彎女兒俏誰把駙馬招蘇武李陵意氣豪從此漢胡兩相好馬不南下弓在鞘

五律

丙戌

觀兵 次吳俊升韻

茅廬猶在蜀三顧感時非冀北空兵馬隴西一布衣  
遠遊思國甚隔望娛親稀  
瀛海男兒志觀兵弔落暉

丁亥

玉峯 次孟郊韻

入夜流星殞行雲憩石牀峯巍文筆立湖翠野花香  
獨鶴來天表孤帆接水光  
危亭憑弔處忍說舊沙場

謁 亭林先生墓 次張祐韻

八載西征後三吳氣未吞書遺黃石屐山擁白雲根  
秦塔峯頭樹茜墩水上村  
高風垂萬世開繼大成門

草山

結廬在草山講學入林間蟲詠秋聲賦漁歌淡水灣  
雁鷗沙嶼遠潮汐海天還  
偶憶陽明語知難行亦艱

五絕

辛巳

獨山所見

馬店留人住黃鵬客去閒  
四蹄聲得得同望盡童山

甲申

謝許士騏贈畫

故人贈我畫西海白雲封  
世事全忘却撐天一老松

丁亥

題施翀鵬仿黃鶴山水

黃鶴飛仙去山樵意自濃  
秋深霜葉老江海白雲封

七律

辛巳

耒陽

耒陽今日草青青大舜薰風沐九經  
鳥語花香工部墓霞明星耀伯陵  
亭蔡倫有紙酬詩句谷朗無名伴  
嶽靈只待祝融聽告捷豐碑矗立萬年馨

桂黔道中

七省遨遊說遠征八千里路此歸程  
源分湘桂波濤伏關劈崑崙敵寇驚  
幾朵浮雲如雪白半簾飛瀑自冰清  
炎蒸溽暑天心悔雨過黔山慰客情

壬午

贈郭沫若

文章磊落放情真，瀛海豪吟獻女神。  
爲譜明妃悲出塞，更欽聶姊教成仁。  
燕歌棠棣先民樂，龜甲尊彝宿學新。  
彩筆東籬欣有夢，中天載酒趁良辰。

風柔

風柔日薄困人天，如此春光又一年。  
病裏情懷憐皓月，夢中消息託飛煙。  
嚶嚶求友鶯聲好，栩栩忘身蝶影翩。  
獨立閒階凝佇處，一心無著轉悠然。

癸未

寄慰實秋病中

人生意義何由識，痛苦來時獨樂天。  
有病難忘身作客，無眠便覺夜如年。  
安心是藥曾相勸，壯志得閒豈自憐。  
信有扁華今再世，膏肓能起便夷然。

龍門浩贈叔藝

五年避蜀辭家久把酒相親夜話長  
浩月當空催入夢龍門望海亦思鄉  
治絲不素稱奇蹟無垢能明見寶光  
洗得銀針逢乞巧天孫舞綵玉卮香

空齋

無端簾外雨如絲對影燈前入夢遲  
未免有情新別後不堪回首乍逢時  
花殘月缺天應惜煙斷香銷客自知  
淒絕空齋靜掩處漫嗟此恨補無期

乙酉

歲朝寄母

年年此日倍思親欲拜萱闈歲又新  
豈有男兒難養母竟無高閣可懷椿  
移家滬海雲天望洗甲梁溪草木春  
七載嘉陵人未老沙坪景色耐松筠

往事

七年往事猶堪憶，妻子高堂隔舊京。  
牯嶺元戎籌決策，蘆溝倭寇亂興兵。  
一家驚聚征車上，萬里悲歡徐海迎。  
爲念滬濱烽火急，呱呱早報慰中生。

贈前谿先生

七載黔靈有去思，南明堂下夙欽遲。  
清風好買花谿水，閒筆方吟人日詩。  
前路寇深安若定，一朝師出險爲夷。  
六韜七略羅胸熟，神武元戎仗總持。

悼黃方剛

彭殤修短倘前知，柱下精研枉作師。  
豈信著書能却病，猶憐好學每忘飢。  
家貧兄讓山中果，世亂妻吟海外詩。  
嗚咽長江懷故友，清明時節雨如絲。

丙戌

哀扶桑

山河破碎廢桑麻雪壓重橋帝子家百世興亡前夜事兩京歌舞後庭花神風解甲降旗展武士歸魂旭日斜草木爲墟天地變寒林荒島散昏鴉

秋深

樂天身外自昂藏秋雨梧桐入夢涼初雪情知楓葉老清譚味共菜根香豈爲俗態凝癡慮難得孤衷訴熱腸重賞秣陵松月好空山靈谷夜深長

歷劫

歷劫難堪涕淚賒衆生有願託天涯春風習習生吟草秋水盈盈好種瓜月影虛懷懷滿月花枝空折折無花爲誰辛苦蜂兒釀燕子歸來可認家

丁亥

惠泉

積翠中天幾歲年，惠峯依舊聽松泉。  
等閒孤負三層月，慰藉平生萬壑煙。  
漁隱谿山收畫卷，茶香爐竹贖詩篇。  
貫華飛閣霞能舉，彈指湖波補散仙。

玄武湖

湖上風光別有天，江南春去又經年。  
扁舟拂柳斜陽外，好夢依人逝水前。  
花鳥閒雲愁脈脈，釵鈿橫海影翩翩。  
蒼茫獨對三更月，不待銷魂便黯然。

崑山謁亭林先生墓

越王締造中興業，吳相三分足古今。  
大禹世家原祖禹，東林學派又亭林。  
神州利病從何說，天下興亡欲廢吟。  
瞻拜菑墩遺屐在，秦峯塔影柏森森。

七絕

辛巳

悼滕若渠

笑語長留蜀水濱  
芙蓉本不戀紅塵  
藍田有客傳消息  
藝苑詞林惜此人

壬午

籌邊

籌邊豈必欲生還  
留得丹心照雪山  
指日河清東海靖  
重來策馬出陽關

題傅抱石畫十萬長松

思危豈必獨居安  
風雨故人共歲寒  
細草長松還抱石  
畫圖肯作等閒看

夢次龔定菴韻

生長蘇杭老益州漫誇衣食兩無愁  
天南更有相思樹細膩風光夢也柔

甲申

雨後晴虹

雨後晴虹雪後山柔情何處不相關  
此生好寄雲間老爲夢更深月影寒  
林中高士雲中鶴雨後晴虹雪後山  
竹影松風星月夜人間天上共清寒  
眉宇清揚照座寒蘇東坡品題天女  
本來難龔定菴詩情畫意都忘却  
張恕雨後晴虹雪後山

翰仙兄壬午喪女甲申喪子有哭兒詩二十首賦此慰悼

當年輕別莫追悔七載長征豈豫知  
兒女從來緣白髮迢迢萬里淚雙垂

生逢離亂孝慈難天奪良兒禍不單空有捷音傳海外新詩徹夜哽辛酸  
樽酒燈前強足歡鏡花水月夢中看心香照破紅塵劫自脫眞如到涅槃

乙酉

喜聞婉靖舟發漢皋

夔門一瀉平天下千里江陵蜀道還入口揚帆猶少我寒窗聽雨打孤山

丙戌

東京

御苑神宮不可遊蒼松翠柏尚悠悠依然富士山頭白風雨帆歸一海鷗

橫須賀港

潛空難守橫須賀  
蹈海焚身亦枉然  
九月神風吹不及  
東京灣泊受降船  
吳港

淒淒風雪江田島  
葬海倭師失霸圖  
不信秦王曾遣使  
關西一港早封吳  
廣島

百年迷夢祖戎衣  
廣島成墟一彈飛  
劫後餘生能有幾  
紅顏白髮兩相依  
神戶

登臨未上移情閣  
神戶欣瞻國父書  
待向海濱尋故老  
夜潮已報月盈虛  
大阪

大阪雄姿留古寨  
堅兵利甲蕩無存  
堪憐歷劫殘灰裏  
春雨還招後死魂  
京都

靈光何處射麻姑  
清水寺幽舊帝都  
偶作琵琶湖畔客  
洛陽紙貴會仙圖

倫敦瞻 國父蒙難室

四海干戈歎枉然，救人救世口心傳。  
一瓢一碗遺書在，蒙難而今五十年。  
訪莎士比亞故里

莎翁故里雨中尋，晚禱鐘聲落葉吟。  
商籟不知花事好，秋空淺碧水澄心。  
牛津贈逸伏廬主

長對蒼松好讀書，田園採擷意何如。  
芝蘭挺秀玫瑰徑，多士來歸逸伏廬。  
訪蕭伯納翁

碧草蒼松老著書，蕭翁扶杖出寒廬。  
疎林斗室能容膝，下筆如神道不孤。  
巴黎和會

萬邦信誓合聯盟，衆木難支大廈傾。  
第二巴黎和會集空教，九國約華京。  
飛船過暹羅緬甸

碧海船飛天上去白雲鳥入夢中迴  
神州禹甸扶南國風物依稀似舊來  
先父三十周忌祭

奉母重違經月別飛帆萬里託歸鷗  
鄉心五處同長夜淚灑孤兒三十秋  
海外歸來寄友

艱難最是承平後痛憶焚書一炬秦  
蜀道歸來重賦別東西南北漫遊人

丁亥

清涼山

無邊風月詩僧健一片清涼掃葉歸  
明日桃花煙雨瘦采薇亭上弔斜暉  
掃葉樓次易實甫韻

聖女仙峯憶可攀翩翩雪鬢與雲鬟  
歸來重作金陵客秋雨梧桐葉滿山

流水桃花忍折攀，莫愁居處漾雙鬟。  
勝棋樓上凝眸久，一片清涼在此山。  
雕闌玉砌不堪攀，愁損朱顏瘦翠鬟。  
惆悵暑風亭畔立，采薇何必首陽山。  
半畝風高共仰攀，題詩滿壁詠青鬟。  
春深底事尋紅葉，只避炎涼到此山。

日月潭

日光華萬古潭，杵歌聲裏棹歌酣。  
玉山天外巫山夢，似聽芭蕉夜雨談。  
環湖涵碧翠層嵐，日光華萬古潭。  
霧鬢雲鬟多變幻，東溟一葦舊天南。  
但學夷齊薇蕨甘，移師跨海赤嵌探。  
紅毛去後山河在，日月光華萬古潭。

杵歌

高山流水白雲端，別有桃源夜渡難。  
一點靈犀通木石，潭心瑩澈杵聲寒。

蕉  
舍  
譯  
詩

# 蕉舍吟草卷五 譯詩

快樂頌 裴多汝第九交響樂第四樂章 席勒原著

哦，朋友們，不是這樣的音！  
且讓我們愉快，愉快的唱奏，  
和歡樂盡情。

快樂，快樂，快樂，  
美麗的神光輝煌。  
天國仙都的女郎，  
我們陶醉，聖火的熱狂，

闖進神聖的天堂！

你的精誠重新團結  
掃盡世俗的參商  
四海之內皆是兄弟，  
看你的柔翼翱翔。

誰會享受偉大的幸福，  
只一個知己相親；  
誰會求得恩愛的淑女，  
便請來歡慶同伸！

呀，誰若有密契的知心，

普天下僅此一人！

倘若沒有遇見，且讓他

啜泣着離開人羣。

大家都從自然的柔胸，

痛飲那快樂千鍾；

一切美好，一切醜惡，

緊跟她的玫瑰芳踪。

她賜我們美酒香吻，  
朋友更是到死相從；  
蟲豸也得領受歡樂，  
天使長守護着聖宮。

快活，快活，且學着太陽，  
學着太陽飛翾。

快活，學着太陽飛翾，  
穿過那無邊的天空。

飛奔，兄弟們，同追蹤，

飛奔，兄弟們，同追蹤，  
快樂的，像一個凱旋的英雄，  
像一個凱旋的英雄。

快樂，美麗的神光輝煌。  
天國仙都的女郎，  
我們陶醉聖火的熱狂，  
闖進神聖的天堂。

你的精誠重新團結，  
掃盡世俗的參商；

四海之內皆是兄弟，  
看你的柔翼翱翔。

擁抱着歡愛，萬千的衆人！  
這世上無雙的一吻！  
擁抱着歡愛，萬千的衆人！  
這世上無雙的一吻！

兄弟們，在繁星的帳幕，  
一定照臨着慈祥的父親。  
兄弟們，在繁星的帳幕，

一定照臨着慈祥的父親。

你們禮拜嗎，萬千的衆人？

你們接受啓示嗎，人們？

去找他，在繁星的帳幕，

在那星幕他常照臨。

快樂，快樂，美麗的神光輝煌。

天國仙都的女郎！

快樂，美麗的神光輝煌，

神光輝煌！

商籟 莎士比亞原著

我會把向前的紫羅蘭這樣譴責，  
甜蜜的香賊，你從什麼時候偷竊  
我那愛人的氣息？高貴的紫色，  
在你溫柔的嫩臉留上的顏色，  
你過分渲染我那愛人的血脈。

我曾責備百合花作為你的手，  
麻若蘭的芽又偷取你的頭髮；  
玫瑰花怕人地伸出刺來立住，

一朵羞得紅，一朵失望得蒼白；

另一朵不紅不白，兩邊都偷些，  
並且還用盜劫分佔你的氣息，  
但因爲他偷竊，儘管生長得嬌，  
一個報復的果蟲吃得他要死。

我看更多的花，但我所看見的  
只是那香與色都從你偷來的。

商頴 翁賽(Ronsard)原著

蕉 舍 吟、草 卷五 譯詩

我不願意把月亮同你的美麗

相比，月亮不常圓，你只有一顆心——

太陽普照着萬物，你只照一個人，

所以，太陽太平常，更不能同你比。

溫良賢淑壓制住怨恨和嫉忌，

我不會用甜言蜜語來向你頌揚：

你就像你自己，不需要畫像，

你就是你的命運，你的上帝。

誰若要把愛人同你相比，

沒有理智，亦太不自量；

智慧和學問，你超過他們太多。

精靈倘若不是你的化身，

賢淑本人便是你的寫真，

雅典便是你，你便是一個溫柔。

我願 翁賽 (Ronsard) 原著

看你真比百合花還白，

誰塗紅了你那朱唇？

誰能描得那樣合式，

白底染成那麼紅潤？

誰描黑了彎彎的黛眉！

誰又塗黑了眼珠，佳人？

絕世的美麗，入我的胸懷！

絕世的美麗，悅我的心靈！

美妙，溫柔，忠實的怨恨，

甜蜜地，迫使我向你輸誠！

驕傲，無情，嗔怒的可愛，

我願同你死，我願同你生！

鴿 (La Paloma)

當我離開了大陸去航海的一天，  
『請爲着流浪兒祝福吧，』我輕輕向你說，  
我希望在航海前同美麗的尼娜見一面，  
可憐兒，她正爲着孤寂的失望而啜泣。

尼娜，倘若我死得離你遠遠的，  
一隻白鴿就會輕快的向你飛；  
請你敞開你的窗，爲那喘飛的鴿子——  
那便是我的靈魂，帶着我的心。

無論生，無論死，我只愛一個你；

唉，我的真情，我的精靈，永不能同你分離。  
無論和平，無論戰爭，

我的精靈將輕快的飛傍你的身。

哦，我的信使就要飛向你，

證明我有一顆不變的心；

那隻鴿子將要永遠依着你，

證明一顆真誠的心怎樣的永恆。

中華民國三十五年一月初版  
中華民國三十七年十月再版

蕉 舍 吟 草 (增訂本一冊)

定價金圓四角八分

外埠酌加運費匯費

著 者 顧 一 樵

發 行人 張 靜 江

出 版 者 世 界 書 局

發 行 所 世 界 書 局

版 權 所 有  
不 准 翻 印

312814  
(11)



32  
266